

Gásta vattáldahka

Dán jage mij la mijáj ávdán ájggop girkkon sierraláhkáj dættodit gástav. Mij la miján gástan? Manen galggap gástaduvvat?

Gitta dallutjis gá Jesus gáhtjoj mijájt gástaduvvat, de li almatja sihtam gástaduvvat. Gássta la imáj. Bágo e máhte állásit tjielggit dav mij dáhpáduvvá. Tjáhtje goajvviduvvá Áhtje, Bárne ja Ájlis Vuojnjanisá namán. Evangeliuma, viesso Bágo baktu, sjaddá tjáhtje ármo ádjagin. Gástadusá baktu sjaddap oassen gásstasubttsasis Jesusa birra guhti jámij ja bajás tjuodtjelij.

Mijá dáhpe la mánná gásstaj guotteduvvá. Ávvudallap ádå iellemav, ja mánáv Jubmela giedaj sisi biedjap. Æjgáda válljiji álov ietjasa mánáj ávdås. Gá mánná gástaduvvá, de æjgáda ja ristæjgáda vásstedi “sidáv” máná ávdås. Valla ij la goassak ilá manjet gástaduvvat. Gá nuora ja álessjattuga gástaduvvi, de ietja vásstedi “sidáv”. Dalloj aj li ristæjgáda gárvvása viehkedit suv guhti la gástaduvvam viessot gástan ja jáhkon Jesusij. Rámátsubttsasa, ráhkálvisá, iehkedismáles ja girkkuj gullut la oassen gásta sjivnnjádusás.

Ristalasj gásta tjáhtje la mærkka mij sisadná sihke iellemav ja jábmemav. Tjáhtje la mijá iellema vuodo valla sæmme bále aj ájtto. Gá gástadusáv ávvudallap de sæmme bále aj bágojt biedjap ja vuornnop dav mij la bahá ja Jubmela sidoda vuosstáj. Dáv aktan dahkap gá vuornnop bærggalav ja dábdástip jáhkov. Gássta ij mijájt gájo bahávuodas, suddos ja fámojs ma biejssti. Dat midjij vaddá doajvov jut iellemfámo li gievrav, ja jut Jubmel mijájt ándagis luojtta ja mijájt rájnne gájkka vieres.

Iellem mijájt bajás ja vuolus doalvvu. Mij lip sihke gievara ja várnnahisá, ja dárbahip gullut aktijvuohtaj. Vájku man moattelágátja lip, gástan aktiduvvap rastá gájkka mij ierit. Gássta vaddá aktijvuodav Kristusijn ja ristagis oarbbenij mijá bájkalasj tjoaggulvisán ja væráltvijddásasj girkkon. Dát aktijvuohta ja la dábbelin ájge ja bájke: danen gá la akta jáhkko, akta gássta ja akta girkkko. Gásta baktu sjaddap duosstela ja gievrroduvvap Jubmelav ja guojmev iehttset.

Gássta la Jubmela vattáldahka, ármos vatteduvvam, gálmamá tjármádieva tjátjes, goajvvidum Áhtje, Bárne ja Ájlis Vuojnjanisá namán ihkeva iellemij. Ávddálijguovlluj mannap Kristusa siegen.